

四庫全書

集部

欽定四庫全書

坡門酬唱集卷十三

宋 邵浩 編

東坡

壺中九華詩

并引 一統志九華山在青陽縣舊名九子山李白謂九峯似蓮花乃更今名

湖口人李正臣蓄異石九峯玲瓏宛轉若牕櫺然
予欲以百金買之與仇池石為偶方南遷未暇也
名之曰壺中九華且以詩記之

清谿電轉失雲峯夢裏猶驚翠掃空五嶺莫愁千嶂外
九華今在一壺中天池水落層層見玉女牕明處處通
念我仇池太孤絕百金歸買碧玲瓏

予昔作壺中九華詩其後八年復過湖口則石已
為好事者取去乃和前韻以自解也

江邊陣馬走千峯問訊方知冀北空尤物已隨清夢斷
真形宛在畫圖中歸來晚歲同元亮却掃何人伴敬通
賴有銅盆修石供仇池玉色自璵璠

魯直次韻

湖口人李正臣蓄異石九峯東坡先生名曰壺中九華并為作詩後八年

自海外歸湖口石已為好事者所取乃和前篇以為笑竇建中靖國元年四月十六日明年當崇寧之元年五月二十日庭堅繫舟湖口李正臣持此詩來石既不可復見東坡亦下世矣感歎不足因次前韻

有人夜半持山去
頓覺浮嵐暝翠空
試問安排華屋處
何如零落亂雲中
能回趙壁人安在
已入南柯夢不通
賴有霜鐘難席卷
袖推來聽響玲瓏

江西

江西山水真吾邦
白沙翠竹石底江
舟行十里磨九瀧
篙聲曄曄相春撞
醉卧欲醒聞淙淙
真欲一口吸老龐
何人得雋窺魚缸
舉叉絕叫尺鯉雙

樂城次韻

許君馬老共一邦
西山斷處流蜀江
誰令十載重渡瀧
灘頭舊寺晨鐘撞
亂流赤脚記淙淙
道俗自謂丹霞龐
便令築室修畦疇
往來二老筇一雙

予與筠州聽長老有十年之舊

遊羅浮山示兒子過

人間有此白玉京羅浮見日鷄一鳴南樓未必齊日觀

鬱儀自欲朝朱明

劉夢得有記羅浮夜半見日事山不甚高而夜見日此可異也山有二石

樓今延祥寺在南樓下朱明洞在沖虛觀後云是蓬萊第七洞天

東坡之師抱朴老真

契蚤已交前生玉堂金馬久流落寸田尺宅今誰耕道

華亦嘗啖一棗

唐永樂道士侯道華竊食鄧天師藥仙去永樂有無核棗人不可得道華獨得

之予在岐山下亦嘗得食一枚

契虛正欲仇三彭

唐僧契虛遇人導游雅川仙府真人問曰

汝絕三彭之仇乎契虛不能答

鐵橋石柱連空橫

山有鐵橋石柱人罕至者杖藜欲

趁飛猿輕雲溪夜逢瘖虎伏

山有瘖虎

斗壇畫出銅龍吟

沖虛

觀後有朱真人朝斗壇近於壇上獲銅龍六又銅魚一

小兒少年有奇志中宵起

坐存黃庭近者戲作凌雲賦筆勢髣髴離騷經負書從

我盍歸去羣仙正草新宮銘汝應奴隸蔡少霞我亦季

孟山玄鄉

唐有夢書新宮銘者云紫陽真人山玄卿撰其畧曰良常西麓原澤東泄新宮宏宏崇軒

嶽轍又有蔡少霞者夢人遺書碑銘曰昔乘魚車今履瑞雲躅空仰塗綺輅輪囷其末題云五雲書閣吏蔡

少霞書

還須畧報老同叔羸糧萬里尋初平

子由一字同叔

藥城次韻

客迷墮澗逢玉京雲行天喬風號鳴暗中過盡石髓滑

驚喜觀闕朝霞明東坡南去類此客擠者力盡非求生
偶然瀕海少氛氣復有福地容躬耕諸侯歷聘謝魯叟
茅簷燕坐師老彭天樞旋結日珠重人寰下視鴻毛輕
俗緣漸覺冰雪解元氣乍復蛟虬寧遠遊脫屣入蓋竹
初怪長史留家庭後來玉斧小兒子亦入真誥參仙經
試令子弟學諸許還家不用劍閣銘洞天聞亦有圖籍
但恐未免如公卿此心願與世無事不願與世平不平

上元夜

前年侍玉輦端門萬枝燈壁月挂罽毼珠星綴觚稜去
年中山府老病亦宵興牙旗穿夜市鐵馬響春冰今年
江海上雲房寄山僧亦復舉膏火松間見層層散策枕
榔林林疎月鬚髻使君置酒罷簫鼓轉松陵狂生來索
酒賈道人道一舉輒數升浩歌出門去我亦歸曹騰

樂城次韻

誰憐東坡老獨看南海燈故人隱山麓燕坐銷牀稜人
生天運中往返成廢興炎起燮下薪凍合瓶中冰賴有

不變處寂如方定僧建成亦巖邑燈火高下層頭陀舊
所識天寒髮鬢髻問我何時來嗟哉谷為陵幸此米方
賤日食聊一升夜出隨衆樂舖糟共騰騰

連雨江漲二首

越井岡頭雲出山
狎江上水如天
牀牀避漏幽人屋
浦浦移家蟹子船
龍卷魚鰕并雨落
人隨雞犬上墻眠
只應樓下平堦水
長記先生過嶺年

急雨蕭蕭作晚涼
卧聞榕葉響長廊
微明燈火耿殘夢

半濕簾帷浥舊香
高浪隱牀吹甕盎
闌風驚樹擺琳琅
先生不出晴無用
留向空堦滴夜長

樂城次韻

南過庾嶺更千山
蒸潤由來共一天
雲塞虛空雨翻甌
江侵城市屋浮船
東郊晚稻須重鋤
西舍原蠶未及眠
獨棹扁舟趁申卯
米鹽奔走笑當年

客到炎陬喜暫涼
江吹虛閣雨侵廊
回看野寺山溪隔
卧覺晨炊稻飯香
荔餉深紅陋櫻棗
桂醅浮白比琳琅

恩移嶠北應非晚未省南遷日月長

六月十二日酒醒步月理髮而寢

羽蟲見月爭翾翻我亦散髮虛明軒千梳冷快肌骨醒
風露氣入霜蓬根起舞三人漫相屬停杯一問終無言
曲肱薤簞有佳處夢覺瓊樓空斷魂

樂城次韻

轍有白髮近二十年矣然止百餘莖
不增不減度州道人王正彥教令拔

去以真水火養之恐不復更生從其言已數
月而白髮不出更年歲不見豈真不生耶子

瞻兄示我月中梳頭詩
戲次來韻言拔白之驗

水上有車車自翻懸雷如線垂前軒霜蓬已枯不再綠
有客勸我抽其根枯根已去紫茸茁珍重已試幽人言
紛紛華髮何足道當返六十過去魂

復次韻和子由

夏畦流膏白雨翻北窓幽人卧羲軒風輪曉入春筍節

露珠夜上秋禾根

或為予言草木之長常在昧明間蚤作而伺之乃見其拔起數寸竹笋尤

甚又夏秋之交稻方含秀黃昏月出露珠起於其根累累然忽自騰上若有推之者或入於莖心或垂於葉端稻乃秀實驗之信然此二事與子由養生之說契故以此為寄
從來白髮有公道始信

丹經非妄言此身法報本無二他年妙絕薰形魂

傳燈錄有

形神俱妙者乃不復有解化之事

白鶴峯新居欲成夜過西隣翟秀才二首

林行婆家初閉戶翟夫子舍尚留關連娟缺月黃昏後

縹緲新居紫翠間繫悶豈無羅帶水

韓退之云水作青羅帶山如碧玉簪

割愁還有劍鉞山

柳子厚云海上天鋒若劍鉞秋來處處割愁腸皆嶺南詩也

中原

北望無歸日隣火村春自往還

甕間畢卓防偷酒壁後匡衡不點燈待鑿平江百尺井

要分清暑一壺冰佐卿恐是歸來鶴次律寧非過去僧
他日莫尋王粲宅夢中來往本何曾

樂城次韻

老罷子卿還屬國功成定遠恨陽關漂流豈必風波險
顛沛何妨枕席間伏臘便應隨俚俗室廬聞似勝家山
因緣宿世非今日賴有陰功許旋還

此說見佛書

山連上帝朱明府心是南宗無盡燈過去歎危空比夢
年來瘴毒冷如冰圖書一笑寧勞客音信頻來尚有僧

梨棗功夫三歲辦不緣憂患亦何曾

行瓊儋間肩輿坐睡夢中得句云千山動麟甲萬
谷酣笙鐘覺而遇清風急雨戲作此數句

四州環一島百洞蟠其中我行西北隅如度月半弓登
高望中原但見積水空此生當安歸四顧真途窮眇觀
大瀛海坐詠談天翁茫茫太倉中一米誰雌雄幽懷忽
破散長嘯來天風千山動麟甲萬谷酣笙鐘安知非羣
仙鈞天宴未終喜我歸有期舉酒屬青童急雨豈無意

催詩走羣龍夢雲忽變色笑電亦改容應怪東坡老顏
衰語徒工久矣此妙聲不聞蓬萊宮

用韻寄子由

我少即多難遭回一生中百年不易滿寸寸彎强弓老
矣復何言榮辱今兩空泥洹尚一路

古語云十方薄伽梵一路涅槃門

所向餘皆窮似聞崆峒西仇池迎此翁胡為適南海復
駕垂天雄下視九萬里浩浩皆積風回望古合州屬此
琉璃鐘離別何足道我生豈有終渡海十年歸方鏡照

兩童還鄉亦何有暫假壺公龍峨眉向我笑錦水為君
容天人巧相勝不獨數子工指點昔游處蒿萊生故宮

樂城次韻

我遷海康郡猶在寰海中送君渡海南風帆若張弓笑
揖彼岸人回首平生空平生定何有此去未可窮惜無
好勇夫從此乘桴翁幽子疑龍鰕牙湏竟誰雄閉門亦
勿見一鷁同香風晨朝飽粥飯洗鉢隨僧鐘有問何時
歸茲焉若將終居家出家人豈復懷兒童老聃真吾師

出入初猶龍籠樊顧甚密俛首姑爾容衆人指我笑羶
鎖無此工一瞬千佛土相期兜率宮

聞子由瘦一首

儋耳至難
得肉食

五日一見花猪肉十日一遇黃鷄粥土人頓頓食諸芋

薦以熏鼠燒蝙蝠舊聞蜜唧嘗嘔吐稍近蝦蟇緣習俗

十年京國厭肥羜日日蒸花壓紅玉從來此腹負將軍

今者固宜安脫粟

俗諺云大將軍食飽捫腹而歎曰吾
不負汝左右曰將軍固不負此腹此

腹負將軍未嘗
出少智慮也

人言天下無正味唧蛆未遽賢麋鹿海

康別駕復何為帽寬帶落驚僮僕相看會作兩臞仙還
鄉定可騎黃鵠

樂城次韻

多生習氣未除肉長夜安眠懶食粥屈伸久已效熊虎
倒掛漸擬同蝙蝠衆笑忍饑長杜門自恐暮年還入俗
經旬輒瘦駭隣父未信腦滿添黃玉海夷旋覺似齊魯
山蕨仍堪嘗菽粟孤舡會復見洲渚小車未用安羊鹿
海南老兄行尤苦樵爨長須同一僕此身所至即所安

莫問歸期兩黃鵠

獨覺

瘴霧三年恬不怪反畏北風生體疥朝來縮頸似寒鴉
焰火生薪聊一快紅波翻屋春風起先生默坐春風裏
浮空眼纈散雲霞無數心花發桃李條然獨覺午牕明
欲覺猶聞醉鼾聲回首向來蕭瑟處也無風雨也無晴

樂城次韻

咄咄書空中有怪內熱搜膏發癰疥羹藜飯芋如固然

飽食安眠真一快
午鷄鳴屋呼不起
欠伸結貝重衾裡
此身南北赴天工
竹杖芒鞋即行李
夜長却對一燈明
上池溢流微有聲
幻中非幻人不見
本來日月無陰晴
十二月十七日夜坐達曉寄子由

燈燼不挑垂暗蕊
爐灰重撥尚餘熏
清風欲發鴉翻樹
缺月初升犬吠雲
閉眼此心新活計
隨身孤影舊知聞
雷州別乘應危坐
跨海幽光與子分

藥城次韻

月入虛牕疑欲旦香凝幽室久猶熏清風巧為吹餘瘴
疎雨時來報斷雲南海炎涼身已慣北方毀譽耳誰聞
遙知挂壁瓢無酒歸舶還將一酌分

謫居三適三首

旦起理髮

安眠海自運浩浩朝黃宮日出露未晞鬱鬱濛濛霜松老
擲從我久齒疎含清風一洗耳目明習習萬竅通少年
苦嗜睡朝謁常憊憊爬搔未云足已困冠巾重何異服

轅馬沙塵滿風駿珂鞍響珂月實與杻械同解放不可
期枯柳豈易逢誰能書此樂獻與腰金公

午窻坐睡

蒲團蟠兩膝竹几閣雙肘此間道路熟徑到無何有身
心兩不見息息安且久睡蛇本亦無何用鉤與手神凝
疑夜禪體適劇卯酒我生有定數祿盡空餘壽枯楊不
飛花膏澤回衰朽謂我此為覺物至了不受謂我今方
夢此心初不垢非夢亦非覺敢問希夷叟

夜卧濯足

長安大雪年束薪抱衾稠雲安市無井斗水寬百憂今
我逃空谷孤城嘯鵠鷗得米如得珠食菜不敢留況有
松風聲釜鬻鳴颺颺瓦盎深及膝時復冷暖投明燈一
爪剪快若鷹辭鞫天低瘴雲重地薄海氣浮土無重腿
藥獨以薪水瘳誰能更包裹冠履裝沐猴

樂城次韻

旦起理髮

道人鷄鳴起趺坐存九宮靈液流下田茯苓抱長松顛
毛得餘潤冉冉欺霜風俯就無數擲九九為一通洗沐
廢已久徐之勿怱怱氣來自湧泉至此知幾重近聞西
邊將袒裼擁馬鬣歸來建赤油不復儕伍同笑我守尋
尺求與真源逢人生各有安未肯易三公

午窻坐睡


定中龍眠膝定起柳生肘心無出入異三昧亦何有晴
牕午陰轉坐睡一何久頽然擁褐身剝啄叩門手褰帷

顧我笑疑我困宿酒不知吾喪我冰消不遺壽空虛無
一物彼物自枯朽夢中得靈藥此藥從誰受侵尋入四
肢欲洗自無垢從今百不欠只欠歸田叟

夜卧濯足

海民慢寒備不畜衾與裯雖苦地氣洩亦無徒跣憂逐
客久未安集舍占鵲鷗念昔使胡中車馳卒不留貂裘
遡北風十襲猶颼颼中途履冰河馬倒身自投宛足費
馮翼千里煩希韞十年事湯劑風雨氣輒浮南來足憂

慮此病何時瘳名身孰親疎謹勿求封侯



坡門酬唱集卷十三

欽定四庫全書

集部

坡門酬唱集卷十四

至六

詳校官中書臣張經田

助教臣常循覆勘

總校官庶吉士臣朱鈐

校對官編修臣盧燧

謄錄舉人臣郭文懿

欽定四庫全書

坡門酬唱集卷十四

宋 邵浩 編

東坡

子由生日

上天不難知好惡與我一方其未定問人力破陰隲少
忍待其定報應真可必季氏生而仁觀過見其實端如
柳下惠焉往不三黜天有時而定壽考未易畢兒孫七

男子

三子
四孫

次第皆逢吉遙知設羅門獨掩懸罄室回思

十年事無愧篋中筆但願白髮兄年年作生日

樂城次韻

弟兄本三人懷抱喪其一頽然仲與叔耆老天所隲師
心每獨往可否輒自必折足非所恨所恨覆鼎實上賴
吾君仁議止海濱黜淒酸念母氏此恨何時畢平生賢
孟博苟生不謂吉歸心天若許定卜老泉室淒涼百年
後事付何人筆于今兄獨知言之泣生日

以黃子木拄杖為子由生日之壽

靈壽扶孔光菊潭飲伯始雖云閒草木豈樂蒙此恥一
時偶收用千載相瘢痕海南無嘉植野果名黃子堅瘦
多節目天材任操倚嗟我始剪裁世用或緣此貴從老
夫手往配先生几相從歸故山不愧仙人杞

本草枸杞一名仙人杖

樂城次韻

老至亦有漸五十惟杖始行年日辰匝幸免鄉閭恥罪
重瘡難平餘痂未脫痕登山足猶健不用扶兒子吾兄

念辛勤贈此攜且倚他年賜環日田舍猶須此早收藤
節杯旋綴烏皮几茅簷數間足不用伐桐杞

李伯時畫其弟亮功舊隱宅圖

樂天早退今安有摩詰長閒古亦無五畝自栽池上竹
十年空看輞川圖近聞陶令開三徑應許揚雄寄一區
晚歲與君同活計如雲鵲鴨散平湖

魯直次韻

今人常恨古人少今得見之誰謂無欲學淵明歸作賦

先煩摩詰畫成圖小池已築魚千里隙地仍栽芋百區
朝市山林俱有累不居京洛不江湖

贈嶺上老人

鶴骨霜髯心已灰青松合抱手親栽問翁大庾嶺頭住
曾見南遷幾箇回

樂城次韻代老人答

嶺頭盧老一鑪灰長短根莖各自栽輕賤已消先世業
知君海上去仍回

過嶺二首

暫著南冠不到頭，却隨北雁與歸休。
平生不作兔三窟，今古何如貉一丘。
當日無人送臨賀，至今有廟祀潮州。
劍關西望七千里，乘興真為玉局游。

七年來往我何堪，又試曹溪一勺甘。
夢裏似曾遷海外，醉中不覺到江南。
波生濯足鳴空澗，霧繞征衣滴翠嵐。
誰遣山鷄忽飛起，半崑花雨落毵毵。

樂城次韻一首

山林瘴霧老難堪歸去中原茶亦甘有命誰令終返北
無心自笑欲巢南蠻音慣習疑僮語脾病縈纏帶嶺嵐
手挹祖師清淨水不嫌白髮照氈氈

和陶止酒

并引

丁丑歲余謫海南子由亦貶雷州五月十一日相
遇於藤同行至雷六月十一日相別渡海余時病
痔呻吟子由亦終夕不寐因誦淵明詩勸余止酒
乃和元韻因以贈別庶幾真止矣

時來與物逝路窮非我止與子各意行同落百蠻裏蕭
然兩別駕各攜一稚子子室有孟光我室惟法喜相逢
山谷間一月同卧起茫茫海南北粗亦足生理勸我師
淵明力薄且為已微疴坐杯酌止酒則瘳矣望道雖未
見隱約見津溪從今東坡室不立杜康祀

樂城和

少年無大過臨老重復止自言衰病根恐在杯酒裏今
年各南遷百事付諸子誰言瘴霧中乃有相逢喜連牀

聞動息一夜再三起
泝流俯仰得此病
竟何理平生不
尤人未免亦求已
非酒猶止之其餘
真止矣飄然從孔
公乘桴南海溟路
逢安期生一笑千
萬祀

和陶勸農

并引

海南多荒田俗以
貿香為業所產秔
稌不足於食乃以
諸_{切時諸}芋雜米作
粥糜以取飽予既
哀之乃

和淵明勸農詩以
告其有知者

咨爾漢黎均是一
民鄙夷不訓夫豈
其真怨忿劫質尋

戈相因欺謾莫訴曲自我人

天禍爾土不麥不稷民無用物怪珍是植播厥熏木腐
餘是穢貪夫汚吏鷹鷂狼食

豈無良田膴膴平陸獸蹤交締鳥喙諧穆驚磨朝射猛
狶夜逐芋羹諸康以飽耆宿

聽我苦言其福永久利爾鋤耜好爾隣耦斬艾蓬蘽南
東其畝父兄搢撻以扶游手

天不假易亦不汝匱春無遺勤秋有厚冀雲舉雨決婦

姑畢至我良孝愛袒跣何愧

逸諺戲侮博奕頑鄙投之生黎俾勿冠履霜降稻實千箱一軌大作爾社一醉醇美

樂城和

并引

子瞻兄和淵明詩六章哀憺耳之不耕予居海
康農亦甚情其耕者多閩人也然其民甘於魚
鮒蟹蝦故蔬果不毓冬溫不雪衣被吉貝故蓺
麻而不績生蠶而不織羅紈布帛仰於四方之

卷十四
負販工習於鄙樸故用器不利醫奪於巫鬼故
方術不治予居之半年凡羈旅之所求皆不獲
故亦和此篇以告其窮庶幾有勸焉

我遷海康寔編於民少而躬耕老復其真乘流得坎不
問所因願以所知施及斯人

我行四方稻麥黍稷果蔬蒲荷百種咸植糞溉耘耔乃
後有穡爾獨何為開口而食

扳拾於川搜捕於陸俯鞠婦子仰薦昭穆閩乘其媮載

未逐逐計無百年謀止信宿

我歸無時視汝長久孰為沮溺風雨相耦築室東臯取
足南畝后稷為烈夫豈一手

斲木陶工器則不匱績麻縑璽衣則有糞藥餌具前病
昌從至坐而告窮相視徒愧

莫為之唱冥不謂鄙一夫前行百夫具履以為不信出
視同軌期爾十年風變而美

坡門酬唱集卷十四

欽定四庫全書

坡門酬唱集卷十五

宋 邵浩 編

東坡

和陶飲酒詩二十首

吾飲酒至少常以把盞為樂往往頽然坐睡人見其醉而吾中了然蓋莫能名其為醉為醒也在揚州時飲酒過午輒罷客去解衣槃薄終日歡不足

而適有餘因和陶淵明飲酒二十詩庶以髣髴其

不可名者以示舍弟子由晁元咎學士

晁元咎名補之時通

判揚
州

我不如陶生世事纏綿之云何得一適亦有如生時寸
田無荆棘佳處正在茲縱心與事往所遇無復疑偶得
酒中趣空杯亦常持

二豪詆醉客氣擁胸中山漼然似冰釋亦復在一言雷
氣實其腹云當享長年少飲得徑醉此秘君勿傳

道喪士失已出語輒不情江左風流人醉中亦求名淵
明獨清真談笑得此生身如受風竹掩冉衆葉驚俯仰
各有態得酒詩自成

蠢蠕食葉蟲仰空慕高飛一朝傳兩翅乃得粘網悲啁
啾同巢雀沮澤疑可依赴水生兩殼遭閉何時歸二蟲
竟誰是一笑百念哀幸此未化間得酒君莫違

小舟真一葉下有暗浪喧夜棹醉中發不知枕几偏天
明問前路已度千金山嗟我亦何為此道常往還未來

寧早計既往復何言

百年六十化念念竟非是是身如虛空誰受譽與毀得
酒未舉杯喪我固忘爾倒牀自甘寢不擇管與絳

頃者大雪年海波翻玉英有士常痛飲飢寒見真情牀
頭有敗榼孤坐時一傾未能平體粟且復澆腸鳴脫衣
裹凍酒每醉念此生

我坐華堂上不改麋鹿姿時來蜀岡頭喜見霜松枝心
知百尺底已結千歲奇煌煌凌霄花纏繞復何為舉觴

醉其根無事莫相羈

笑渠在秋水時節自闔開清風亦何意入我芝蘭懷一
隨採折去永與江湖乖斷絲不復續斗水何足栖不如
玉井蓮結根天地泥感此每自慰吾事幸不諧醉中有
歸路了了初不迷乘流且復逝抵曲吾當回

籃輿兀醉守路轉古城隅酒力如過雨清風消半途前
山正可數後騎且勿驅我緣在東南往寄白髮餘遙知
萬松嶺下有三畝居

民勞吏無德歲美天有道暑雨避麥秋溫風送蠶老三
咽初有聞一溉未濡槁詔書寬積欠父老顏色好再拜
賀吾君獲此不貪寶頽然笑阮籍醉几書謝表

我夢入小學自謂總角時不謂有白髮猶誦論語辭人
間本兒戲顛倒畧似茲惟有醉時真空洞了無疑墜車
終莫傷莊叟不吾欺呼兒具紙筆醉語輒錄之

醉中雖可樂猶是生滅境云何得此身不醉亦不醒癡
如景升牛莫保尻與領點如東郭篋束縛作毛穎乃知

嵇叔夜非坐虎文炳

我家小馮君天性頗淳至清坐不飲酒而能容我醉歸
休要相依謝病當以次豈知山林士骯髒乃爾貴乞身
當念早過是恐少味

去鄉三十年風雨荒舊宅惟存一束書寄食無定迹每
用愧淵明尚取禾三百頎然六男子粗可傳清白於吾
豈不多何事復歎息

嘒嘒六男子絃誦各一經復生五丈夫戢戢丁欲成歸

田了門戶與國充踐更普兒初學語玉骨開天庭淮老
如鶴雛破殼已長鳴舉酒屬千里一歡愧凡情

淮海雖故楚無復輕揚風齋厨聖賢雜無事時一中誰
言大道遠正賴三杯通使君不夕坐衙門散刀弓

何人築東臺一郡坐可得亭亭古浮圖獨立表衆惑蕪
城閬興廢雷塘幾開塞明年起華堂置酒弔亡國無令
竹西路歌吹久寂默

晁子天麒麟結交及未仕高才固難及雅志或類已各

懷伯業能共有丘明恥歌呼時就君指我醉鄉里吳公
門下客賈誼獨見紀請作鵬鳥賦我亦得坎止為樂當
及時綠髮不可恃

蓋公偶談道齊相獨識真頽然不事事客至先飲醇當
時劉項罷四海瘡痍新三杯洗戰國一斗消強秦寂寥
千載後陽公嗣前塵醉卧客懷中多言笑徒勤我時閒
舊史獨與三人親未暇餐脫粟苦心學平津草書亦何
用醉墨淋衣巾一揮三十幅持去聽座人

樂城和

我性本疎懶父母強教之逡巡就科選逮此少年時幽
憂二十年懶性祇如茲偶然踐黃閭俯仰空自疑乞身
未敢言常愧外物持

人言性本靜不必林與山世雖有此理知誰非妄言自
我作歸計於今十餘年低回軒冕中此語愧虛傳

世人豈知我兄弟得我情少年喜文章中年慕功名自
從落江湖一意事養生富貴非所求寵辱未免驚平生

不解飲欲醉何由成

秋鴻一何樂空際乘風飛秋蟲一何憂壁間終夜悲憂
樂本何有力盡兩無依物生逐所遇久行不知歸少年
氣難回老者百事哀聊復沃以酒永與狂心違

昔在建成市鹽酒晝夜喧夏潦恐天漏冬雷知地偏妻
孥日告我胡不反故山一來朝廷上七十不知還有寓
均建成且志昔日言

夢中見百怪一一皆謂是醉中身已忘萬事隨亦毀此

心不應然外物妄使爾安心十年後此語知非綺

開卷觀古人誰非一世英骨肉委黃墟泯滅俱無情
憧憧來無盡擾擾相奪傾驚雷震朱夏鮮能及秋鳴
得酒且酣飲問誰逃死生

明月出東墻萬物含餘姿孤蟬庇繁陰衆鳥栖高枝
解衣適少事捫腹知亡竒朝與羣動作暮復何所為
此時不自有日出還受羈

尺書千里至輟食手自開將卜東南居故鄉非所懷
勿

言湖山美永與平生乖鴻雁秋南來及春思故栖蛟龍
乘風雲既雨反其泥兄弟通四海叩門事雖諧直道竟
三黜去國終恐迷何如自衛反閼里從參回

羌氏忘君恩戰鼓驚西隅邊候失晨夜驛騎馳中途詔
書止窮征諸將守來驅敵微勢可料師競力無餘防邊
未云失憂愧懷安居

脩己以安人嗟古有此道平生妄為得忽忽恨老年
來亦見用何益世枯槁逡巡事朝謁出入自媚好報君

要得人被褐信懷寶斯人何時見即上歸耕表

春早麥半死夏雨欣及時出郊視禾田父老有好辭秋
陰結愁霖似欲直敗茲冥冥人天際景響良不疑精誠
發中禁愍默非有欺雖號日東出乃令民信之

天厨釀冰池搖蕩畏出境哀年雜羸病一醉百不醒驚
臺異諸曹有政非簿領頽然雖無責固謝出囊頽回首
愧周行羣英聚彪炳

淮海老使君受詔行當至居官不避事無事輒徑醉平

生自相許兄先弟亦次東南豈徒往多難嫌暴貴白首
六鄉中嚼蠟那復味

去年旅都城三月不求宅彼哉安知我爭掃習禮迹三
已意無怨心伏鷙鳥百無私心如丹經患髮先白功名
已不求餘事復何惜

家居簡餘事猶讀外景經浮塵掃欲盡火棗行當成清
晨委羣動永夜依寒更低帷閤重屋微月流中庭依松
白露上厯坎幽泉鳴功從猛士得不取兒女情

南方有貧士狂怪如病風垢面髮如葆自汙屠酒中導
我引河水上與崑崙通長箭挽不盡不中無尤弓

清秋九日近菊酒皆可得永愧陶翁飢雖飢心不惑懷
忠受正命賦命本通塞斯人今若在可與同事國惜哉
委荆榛忍飢長嘿嘿

我友二三子兼有仕未仕青松出林秀豈獨私與已歛
然不求人而我自疊恥臨風忽長鳴誰信日千里江行
視漁父但自正綱紀持綱起萬目魴鱗皆可止老成日

就哀所餘殆難恃

諸妄不可賴所賴惟一真內欲求性命油然反清淳外
將應物化致一常自新商於四父老攜手初逃秦翻然
感漢德投足復踐塵出處蓋有道豈為諸呂勤嗟我千
歲後淡然與之親還將山林姿俛首要路津囊中舊時
物布衣白綸巾功成不歸去愧此同心人

文潛和十九首

鄙性嗜酒親朋所知也紹聖丙子得官明道寓居宛丘職閒無

事終日杜門人知其好飲也或饋之酒不問
寒暑日飢數酌飲雖不多而樂則有餘因讀

淵明飲酒詩竊愛其文辭而慕其放達因次其韻嗟余與淵明神交於千載之上者豈敢論詩哉直好飲者庶幾耳得詩一十九首又缺一首共存一十八首

我欲常飲酒俗事苦奪之飲酒不得醉何如未飲時顛倒衆譏笑佳處正在茲念此雖杜門濁醪日常持

出門憚應接俗事多不情對酒輒拜辭好禮以求名嗟名幾何曷足善爾生共處一泡中倏忽風濤驚好飲信無補不飲亦何成

我久喜文辭思與鴻鵠飛老來覺非是念昔正可悲買

金鑄杜康百拜誓歸依
晉陶與康伯九原吾與歸
涉世苦不諧多病身早衰
惟有尊中君不與我心違

處樂非縱情處靜非避喧
豪吟與枯槁彼各據一偏
悠然獨樂處在我不在山
義皇迹已遠三酌呼可還
一樽每獨睡不待賓客言

所嗜人不得一物百非是
猶有尊中酒道勝無敢毀
彼哉譏謗者誑口而信耳
當憂十八隔罰此繆語綺

自庇無一椽道人分半宅
屋西羅古殯寒草無人跡
纍

纍長與少豈復待年伯鶚飛朝樹疎蟲弔宵月白平生
或不飲至此方知惜

曹參漢賢相掾吏亦豪英四海付醇酒乃真知物情亡
秦餘毒烈一洗百壺傾和氣薰醉人金革乃不鳴卑卑
談治道陋矣洛陽生

種樹東簷下雨來發幽姿微陽動九地光彩變新枝榮
衰一以異枯槁易神竒消息天使然人功徒爾為杜門
沽酒飲高懸吾馬羈

里有好事者我往尊輒開我亦為之盡每往亦開懷尚
慮數見厭動作旬月乖今晨起苦晚獨坐見烏棲冬溫
雪作雨里巷苦多泥且復閉門坐開卷理多諧誰知無
言中獨性不自迷得意復終日弭車不復回

弱歲慕世名中年頗探道世間無非苦病死與生老相
尋無窮已遞代作榮槁奇哉竺乾書百遍愈讀好汙泥
雖云濁本不害吾寶酒雖破淨律吾事在律表

昔嘗罹厄疾一卧輒踰時念無所歸咎乃誓與酒辭那

知偶不死持盃復飲茲既飲輒為盡快哉復何疑神暢
病自去此說信不欺藥石傷天和此方吾笑之

世間有醉鄉百世本一境欲遊不待駕但畏足病醒其
鄉無限界亦不阻巖嶺陰陽無疾癘風俗盡箕賴君往
余請從無待宵燭炳

酒盡輒起沽耽然待酒至呼兒挈樽杓未酌兀已醉譬
如念醯醢流液不待味醉容失揖讓醉語少倫次坐容
皆搖頭知希故我貴

兒童居宛丘里巷昔所經重来三十年落魄竟何成叩
門問長老主人多已更蕭蕭城南道松栢拱墳庭念此
久興歎遊不待鷄鳴悠然且飲酒聊以慰平生

歲晏霰雪集客庭號北風老人不復出兀坐小齋中忽
然身且老惜此歲時窮一弛不復張吾身如挂弓

淵明酒不足種秫猶可得無秫酒須求時人嘲我惑寧
當且酣醉謹勿疑通塞似憎獨醒人豈有禁酒國酩酊
忘對言滿引常默默

樂天好飲者少亦登貴仕八年潯陽謫學道乃忘已與
時雖寡怨行已終有恥抗顏立朝廷放志傲閭里優游
禍福間出處皆可紀乘流與偕逝遇坎輒復止酣歌盡
百年天理端可恃

吾知李太白瀟灑本天真一飲三百杯不問漓與醇子
雲亦好飲白髮事亡新奇窮易投閣區區賦劇秦兩賢
竟誰樂千載同埃塵平生事百懶而獨於酒勤生事萬
緣疎而獨於酒親皇皇魯尼父隱者笑知津我欲去即去

柴車不勞巾但飲百年中不愧飲酒人

无咎和

少賤足可喜險阻更嘗之為親謀斗粟無意出競時
緬焉效一官報國方在茲寧當不恤緯對酒懷憂疑學道
恨力淺中遭世網持

沈飲非荒宴凜然忽顏山或人欲問事已醉不能言古
來亦如此名字垂千年但問酒中適豈計飲者傳

陶公羣于人而無人之情詩豈世外語世語不可名東

坡憐此翁同調但隔生形光來戶屢真處人不驚得酒
自醒醉放意無虧成

園林日夕好花繁時鳥飛少年玩芳物不飲成坐悲只
今未白髮念昔已依依紛華戰吾道決勝當有歸挫銳
培其根外槁中匪衰念方終日行輜重安得違

一眼異青白口語來啾喧酌一不酌一用意何其偏誰
似子孫子高栖蘇門山時隨嶺雲出又與林鳥還平生
但長嘯獨為嵇生言

高賢衆所懷衆理應取是如何濟衆事難成復易毀功
成身無與天運亦復爾軒裳役羣愚兒曹眩文綺

庭前兩古柏凌霄粲其英問此誰榮枯雪霜見其情榮
枯何足計有酒還自傾熟寐暫展轉覺來一蟬鳴歸休
但如此便足了平生

功名有天命美好無定姿雲夢未足吞聊可巢一枝同
時金門士文學多瑰奇幙被向淮海酣放遽爾為車蓋
豈不榮野馬不受羈

城東故鹽渠自昔誰所開似說全盛時邈焉一長懷穿
渠引江水此計未為乖千帆競暮入集浦如鳥棲萬疇
分白浪嘉稻擢新泥恐此太多事且當寄嬉諧疏通養
魚鳥花柳共低迷時時載酒往江上亦忘回

大明唐來寺廢苑西南隅青松拱高阜崎嶇有微途肩
車病我早一馬良可驅衆木媚深壑氣薰時雨餘此焉
可數醉何用葺吾居

蘇公士冠冕復似郭有道知士未達間趣操保耆老精

鋼試九火勞倦容不槁為州第飲酒況此年歲好藏鋒
避世故輕敵喪吾寶時來用毫末勲業自世表

東漢有兩士才智炫一時三公往訪事卧疴亦見辭偉
明獨不然小道安取茲斯人似水鏡與世破昏疑憂國
不為身百世那可欺舉杯相歡屬是事亦置之

齋居忽若遺不識身與境頗疑酣中似奈爾輒復醒東
坡自云然挈世一裘領是事吾有師安得囊出穎指窮
火已傳豈待得薪炳

安昌漢耆儒樂飲侈亦至東坡儉不固少飲得徑醉愚
敢效戴崇正復思其次旁通獲親愛公亦安所貴便坐
時一卮彭宣寧寡味

幼聞錦江春欲訪子雲宅叩門問奇字便掃四方迹青
雲看一鶚凡毛愧累百勞公諭伯業齒堅頭未白何當
擺俗累歲月可惋惜

王道無偏黨此語聞諸經高賢如大海亦以衆流成文
饒歎維州刀鋸人所更相如後私怨此語驚秦庭小人

慮事疎妄意鹽車鳴安得如江酒洗我塵垢情

淮南夏早收晚秧亦含風連艫似雍絳千斛輸吳中使
君飲酒樂歲美闕梁通安得天下人俱忘楚人弓

十年一麥禾此歲亦難得寄語吾州人不飲良大惑經
時無死市吏責亦可塞先生門弟子佐守同一國舉杯
日相屬有句安得默

堂堂門下公英發自初仕卷舒固以時出處不為已朝
廷登儒輔德禮民有恥岷峨更崢嶸清風在閭里獨醒

固不惡既醉又可紀成王訪落時百室賦盈止吾儕爲
國謀私愛不足恃

黃子似淵明城市亦復真陳君有道舉化行閭井淳張
侯公瑾流英思春泉新高才更難及淮海一髯秦嗟予
竟何爲十駕晞後塵文章不急事用意斯已勤平生不
共飲歎息無與親問道伯昏室何人獨知津各在天一
方淚落衣上巾歸休可共隱山中復何人

坡門酬唱集卷十五

欽定四庫全書

坡門酬唱集卷十六

宋 邵浩 編

東坡

和陶擬古九首

有客叩我門繫馬門前柳庭空鳥雀噪門閉客立久主人枕
書臥夢我平生友忽聞剝啄聲驚散一杯酒倒裳起謝客夢
覺兩愧負坐談雜今古不答顏愈厚問我何處來我來無何有

酒盡君可起我歌已三終由來竹林人不數濤與戎有
酒從孟公慎勿從揚雄崎嶇頌沙麓塵埃汙西風昔我
未嘗達今者亦安窮窮達不到處我在阿堵中

客去室幽幽鵬鳥來坐隅引吭伸兩翮太息意不舒我
生如寄耳何者為我廬去此復何之少安與汝居夜中
聞長嘯月落荒榛蕪無問亦無答吉凶兩何如

少年好遠遊蕩志隘八荒九夷為藩籬四海環我堂廬
生與若士何足期杳茫稍喜海南州自古無戰場奇峰

望黎母何異嵩與邱飛泉瀉萬仞舞鶴雙低昂分流未
入海膏澤瀰此方芋魁儻可飽無肉亦奚傷

黎山有幽子形槁神獨完負薪入城市笑我儒衣冠生
不聞詩書豈知有孔顏脩然獨往來榮辱未易關日暮
鳥獸散家在孤雲端問答了不通歎息指屢彈似言君
貴人草莽棲龍鸞遺我吉貝布海風今歲寒

馮洗古烈婦翁媪國於茲策勲梁武後開府隋文時三
世更險難一心無磷緇錦繖平積亂犀渠破餘疑廟貌

空復存碑版漫無辭我欲作銘志慰此父老思遺民不
可問樓句莫予欺犧牲菌雞卜我當一訪之銅鼓壺盧
笙歌此迎送詩

沉香作庭燎甲煎紛相和豈若炷微火縈煙媚清歌貪
人無饑飽胡椒亦求多朱劉兩狂子隕墜如風花本欲
竭澤漁奈此明年何

朱初平劉誼欲冠
帶黎人以取水沈

鷄窠養鶴髮及與唐人游來孫亦垂白頗識李崖州再
逢盧與丁閱世真東流斯人今在亡未遽掩一丘我師

吳季子守節到晚周一見春秋末渺焉不可求

城南有荒池瑣細誰復採幽姿小芙蕖香色獨未改欲
為中州信浩蕩絕雲海遙知玉井蓮落藥不相待攀躋
及少壯已失那容悔

樂城和

客居遠林薄依牆種楊柳歸期未可必成陰定非久邑
中有佳士忠信可與友相逢話禪寂落日共杯酒艱難
本何求緩急肯相負故人在萬里不復為薄厚米盡鬻

衣衾時勞問無有

閉門不復出茲焉若將終蕭然環堵間乃復有為戎我
師柱下史久以雌守雄金刀雖云利未聞能斫風世人
欲困我我已安長窮窮甚當辟穀徐觀百年中

蕭蕭髮垂素晡日迫西隅道人憫我老元氣時卷舒歲
惡風雨交何不完子廬萬法滅無餘方寸可久居將掃
道上塵先拔庭中蕪一淨百亦淨我物皆如如

夜夢被髮翁騎麟下大荒獨行無與遊闕然歎我堂高

論何崢嶸微言何渺茫我徐聽其說未離翰墨場平生
氣如虹宜不葬北邙少年慕遺文奇姿揖昂昂哀罷百
無用漸以園斲方隱約就所安歛退還自傷

海康雜蠻蠻禮俗多未完我居近閭閻請先化衣冠衣
冠一有恥其下胡為顏東隣有一士讀書寄賢關歸來
奉親友跬步行必端慨然顧流俗歎息未敢彈提提烏
鳶中見此孤翔鸞漸能衣裘褐袒裼知惡寒

佛法行中原儒者恥論茲功施冥冥中亦何負當時此

方舊雜染渾渾無名緇治生守家室坐使斯人疑未知
酒肉非能與生死辭熾哉吳閩間佛事不可思生子多
穎悟得報豈汝欺時有正法眼一出照耀之誰為邑中
豪勤誦我此詩

憂來感人心悵悵久未和呼兒具濁酒酒酣起長歌歌
罷還獨舞黎麥力誠多憂長酒易消釋去如風花不悟
萬法空子如此心何

杜門人笑我不知有天游光明遍十方咫尺陋九州此

觀一日成衮衮通法流竿木常自隨何必反故丘老聃
白髮年青牛去西周不遇關令尹履迹誰能求

鋤田種紫芝有根未堪採逡巡歲月度歎息毛髮改脩
然玉露下滴瀝投滄海須臾忽長茂枝葉行可待夜燒
沉水香持戒謹無悔

和陶雜詩

斜日照孤隙始知空有塵微風動衆竅誰信我忘身一
笑問兒子與汝定何親從我來海南幽絕無四隣耿耿

如缺月獨與長庚晨此道固應爾不當怨尤人

故山不可到飛夢隔五嶺真遊有黃庭閉目寓兩景室
空無可照火滅膏自冷披衣起視夜海濶河漢永西牕
半明月散亂梧楸影良辰不可繫逝水無由騁我苗期
後枯持此一念靜

真人有妙觀俗子多妄量區區勸粒食此豈知子房我
非徒跣相終老懷未央兔死縛淮陰狗功指平陽哀哉
亦可羞世路皆羊腸

相如偶一官嗤鄙蜀父老不記犢鼻時滌器混傭保著
書曾幾何渴肺灰土燥琴臺有遺魄笑我歸不早作書
遺故人皎皎我懷抱餘生幸無愧可與君平道

孟德黠老狐姦言噬鴻豫哀哉喪亂世梟鸞各騰翥逝
者知幾人文舉獨不去天方斲漢室豈計一郗慮昆蟲
正相齧乃比蘭相如我知公所坐大名難久住細德方
險微豈有容公處既往不可悔庶為來者懼

博大古真人老聃關尹喜獨立萬物表長生乃餘事稚

川差可近儻有接物意我頃登羅浮物色恐相值徘徊
朱明洞沙水自清駛滿把菖蒲根歎息復棄置

藍喬近得道常苦世逼迫西遊王屋山不踐長安陌爾
來寧復見鳥道渡太白昔與吳遠遊同藏一瓢窄潮陽
隔雲海歲晚儻見客伐薪供養火看作棲鳳宅

南榮晚聞道未肯化庚桑陶頑鑄強鑛枉費塵與糠越
子古成之韓生教休糧參同得靈鑰九錄啟伯陽鵝城
見諸孫貧苦我為傷空餘焦先室不傳元化方遺像似

李白一奠臨江觴

餘齡難把玩妙解寄筆端常恐抱永歎不及丘明遷親友復勸我放心餞華顛虛名非我有至味知誰餐思我無所思安能觀諸緣已矣復何歎舊說易兩篇

申韓本自聖陋古不復稽巨君縱獨恣借經作巖崖遂令青衿子珠璧人人懷鑿齒井蛙耳信謂天可彌大道久分裂破碎日愈離我如終不言誰悟角與羈吾琴豈得已昭氏有成虧

欽定四庫全書

城門酬唱集
卷十六

七

我昔登朐山日出觀滄涼欲濟東海縣恨無石橋梁今
茲黎母國何異于公鄉蠓浦既粘山暑退亦飛霜所欣
非自調不怨道里長

藥城和

時有赦
書北還

大道與衆往疾驅祇自塵徐行聽所之何者非吾身却
過白鶴峯鷄狗來相親築室依果樹有無通四鄰安眠
豈有足良夜惟恐晨晨朝亦何事倦對往來人

莫言三謫遠歸路近庾嶺誰憐東坡窮垂老徒北景辛

無薪炭後豈念冰雪冷平生笑子厚山水記柳永孜孜
苦懷歸何異走逃影吾觀兩蠻觸出縮方馳騁百年寄
龜息幸此支牀靜

我來適惡歲斗米如珠量何時舉頭看歲月守心房念
我東坡翁忍飢海中央願公勿言飢稷卨調陰陽玉池
有清水生肥滿中腸

故山縱得歸無復昔遺老家風知在否後生恐難保似
聞老翁泉曾作泥土燥窮冬忽涌溢絡繹餅罌早此翁

終可信明月耿耿懷抱從我先人遊安得不聞道

幽居如蟄蟲雷雨驚奮豫無根不萌動有翼皆騫翥嗟
我獨枯槁無來孰為去念兄當北還海濶煎百慮往來
七年間信矣夢幻如從今便築室占籍無所住四方無
不可莫住生滅處縱浪大化中何喜復何懼

嘗聞左師言少子古所喜二兒從兩父服辱了百事佳
子何關人自怪餘此意看書時獨笑屢與古人值他年
會六子道眼誰最駛衣鉢儻可傳田園不須置

舜以五音言二雅良褊迫變風猶井牧騷人遂阡陌周
餘幾崩壞况經甫與白嶮嶮收狂瀾還付濫觴窄二莊
涇渭雜恐有郭象客壁藏待知者金石聞舊宅

大道如金石六經所耕桑家傳易春秋未易相糝糠久
種終不穫歲晚嗟無糧念此坐歎息追飛及顏陽天公
亦假我書成麟未傷可憐陸忠州空集千首方何如學
袁盎日把無何觴

五年寓黃閣盛服朝玄端愧無昔人姿謬作奇章遷

牛僧

孺亦貶
循州

還從九淵底回首百尺顛身世俱一夢往來適

三餐天公本無心誰為此由緣從今罷述作盡付逍遙

篇

吾兄昔在朝屢欲請會稽誓將老陽羨洞天隱蒼崖

兄已

買田陽羨近張
公善卷二洞天

時事乃大謬寧復守此懷區區芥子中

豈有兩須彌舉眼即見兄何者為別離尻輿駕神馬孰
為策與羈弭節過蓬萊海波看增虧

紅爐厄夏景團扇悲秋涼來鴻已遵渚去燕亦辭梁冰

蠶懷凍藪火鼠安炎鄉曲士漫談道夏蟲豈知霜物化
何時休歎息此路長

和陶停雲

并引

自立冬以來風雨無虛日海道斷絕不得子由書
乃和淵明停雲詩以寄

停雲在空黯其將雨嗟我懷人道修且阻眷此區區俛
仰再撫良辰過鳥誓不我佇

颺作海渾天水冥濛雲屯九河雪立三江我不出門寤

寐北牕念彼海康神馳往從

凜然清癯落其驕榮餽莫化之廓兮忘情萬里遲子晨
興宵征遠虎在側以寧先生

對奕未終摧然斧柯再遊蘭亭默數永和夢幻去來誰
少誰多彈指歎息浮雲幾何

樂城和

并引

丁丑十月海道風雨僮雷郵傳不通子瞻兄和

陶淵明停雲四章以致相思之意轍亦次韻以報

雲跨南溟南北一雨瞻望匪遙檻穽斯阻夢往從之引
手相撫笑言未卒捨我不佇

晚稻欲登白露宵濛人飲嘉平漿酒如江

雷人以十月
臘祭凡三日

飲酒
作樂

我獨何為觀成於牕欲詰其端來無所從

欣然微笑是無枯榮手足相依所鍾則情情忘意消神
凝不征可以安身可以長生

跋扈飛揚誰非南柯運歷相尋憂喜雜和我游其外所
享則多拔木之深其如予何

和陶歸去來兮辭

并引

子瞻謫居昌化和陶淵明歸去來辭蓋以無何有之鄉為家雖在海外未嘗不歸云爾

歸去來兮吾方南遷安得歸卧江海之頑洞弔鼓角之
悽悲迹泥蟠而愈深時電往而莫追懷西南之歸路夢
良是而覺非悟此生之何常猶寒暑之異衣豈襲表而
念葛蓋得痛而喪微我歸甚易匪馳匪奔俯仰還家下
帷闔門藩垣雖缺堂室故存挹我天醴注之窪樽飲月

露以洗心殮朝霞而眩顏混客主以為一俾婦姑之相
安知盜竊之何有乃培門而折闕廓園鏡以外照納萬
象而中觀治廢井以晨汲滂百泉之夜還守靜極以自
作時雀躍而鯢桓歸去來兮請終老於斯游我先人之
敝廬復舍此而焉求均海南與漠北挈往來而無憂畸
人告余以一言非八卦與九疇方飢須糧已濟無舟忽
人牛之皆喪但喬木與高邱驚六用之無成自一根而
反流望故家而永息曷中道而三休已矣乎吾生有命

歸有時我初無行亦無留駕言隨子聽所之豈以師南
華而廢從安期謂湯稼之終枯遂不溉而不耔師淵明
之雅放和百篇之清詩賦歸來之新引我其後身蓋無
疑

樂城和并引

予謫居海康子瞻以和淵明歸去來之篇要余同
作時余方再遷龍川未暇也辛巳歲余既還潁川
子瞻渡海浮江至淮南而病遂沒於晉陵是歲

十月理家中舊書復得此篇乃泣而和之蓋淵
明之放與子瞻之辨余皆莫及也示不逆其意焉耳
歸去來兮歸自南荒又安歸鴻乘時而往來曾奚喜而
奚悲曩所惡之莫逃今雖歡其足追蹈天運之自然意
造物而良非蓋有口之必食亦無形而莫衣苟所賴之
無幾則雖喪其亦微吾駕匪良吾行弗奔心游無垠足
不及門視之若窮挹焉則存俯仰衡茆亦有一尊既飯
稻以食肉撫簞瓢而愧顏感烏鵲之夜飛樹三繞而未

安有父兄之遺書命却掃而閉關知物化之如幻盍捨
物而內觀氣有習而未忘痛斯人之不還將築室乎西
廡堂已具而無桓歸去來兮世無斯人誰與遊龜自閉
於牀下息眇繇乎無求閱歲月而不移或有為余深憂
解刀劒以買牛拔蕭艾以為疇蓬累而行捐車捨舟獨
棲棲於圖史或以佞而疑邛散衆說之糾紛忽冰潰而
川流曰吾與子二人取已多其罷休已矣乎斯人不朽
誰知時時不我知誰為留歲云往矣今何之天地不我

欺形影尚可期相冬廩之億秭勤春隴之耘耔眎白首
之章黻信稚子之書詩若妍醜之已然豈復臨鏡而自
疑

少游和

歸去來兮眷眷懷歸今得歸念我生之多艱心知免而猶
悲天風飄兮余迎海月炯兮余追省已空之憂患疑是
夢而復非及我家於中途兒女欣而牽衣望松楸而長
慟悲心極而更微升沉幾何歲月如奔嗟我宿昔通籍

壁門賜金雖盡給札尚存愧此散木繆為犧尊屬黨論
之云興雷霆發乎威顏淮南謫於天庖予小子其何安
歲七遷而五譴越鬼門之幽關化猿鶴之有日詎國光
之復觀忽大明之生東釋纍囚而北還灑天漢而一洗
覺宇宙之隨寬歸去來兮請逍遙於至遊內取足於一
身復從物兮何求榮莫榮於不屑樂莫樂於無憂鄉人
告余以有年黍稷鬱乎盈疇止有敝廬泛有扁舟濯余
足兮寒泉振余衣兮古邱洞胸中之滯礙渺雲散而風

流識此行之匪禍乃造物之餘休已矣哉桔槔俯仰無
已時舉觴自屬聊淹留汝今不已將安之封侯已絕念
仙事亦難期依先塋而洒掃從稚子而耘耔候杜康之
廢祠補由庚之亡詩為太平之幸老幅巾待終要奚疑

文潛和

并引

子由先生示東坡公所和陶靖節歸去來辭及
侍郎先生之作命之同賦未輒自閔其仕之不
偶又以弔東坡先生之亡終有以自廣也

歸去來兮行世不偶余曷歸其出無所為喜兮舍去而何悲眄一世之無與兮古之人逝莫追求不疚於余義兮又奚恤餘子之是非彼好惡之罔極兮或顛倒其裳衣顧吾涉之已深兮媿哲人之見微吾歸甚安無所事奔既守吾室又杜吾門一氣孔神兮於中夜存納至和於靈根兮挹天醞於玄尊既充溢於幽闕兮亦粹然而見顏往有坎而茲夷兮昔或危而今安將從化人於西域兮面藏吏於函關將以一世為芻狗兮廢與興吾厭

觀彼福禍之一源兮必茲出而茲還彼自以為無隙兮
何異夫石槨之桓歸去來兮吾悲斯人不返兮豈招仙
聖與之遊昔惠好以好音忽遠去而莫求余曷異於世
人兮初為哽塞而增憂彼錢鏐則深藏兮盡視夫已壟
之田疇萬古芸芸共逝一舟半夜而失旦號其丘畏達
觀之誚余沛已泣而不流悟榮名之取憎兮善斯人之
獲休已矣乎萬物之作各其時吾獨與時而去留豈或
能力而違之既往莫或追來者尚可期蓋雨暝之在天

豈吾稼之不耔彼蜀雄之必傳作猶愧於書詩嗟身屈
而道伸於斯人兮曷疑

无咎

和并序

辭長而歌短歌有和辭無和也言語文章隨世
隨異非擬其辭也繼其志也作者七人矣辭曰
歸去來兮吾無以歸奚以歸既身不足以任責畏首尾
而心悲慕往昔之經世嗟吾力之莫追彼辭位而灌園
豈吾今之獨非雨冥冥而荷笠榛莽莽而褰衣我行野

而視天覺寓大而身微乃矜螭止驅息奔背隍築室
面坂植門三綬縱褫圖書尚存忘瓠落之可憂比浮海
之為尊躒太初而游意弊無極而彫顏反國蝸而自足
俯巢幕而亦安解余轡之沃濡兮脫余牽之間關識鳥
鳴而物華陶陽氣以流觀悟息澗而消枝亦瑾戶而俱
還惟文字之幼工則雖老而桓桓歸去來兮彼河濱之
善游或往學而喪生復裹糧其安求善陶生之達情不
與世兮同憂實迷途其已遠懼斯人之莫疇或待兔守

株或遺劍刻舟雖成事之不說聚悔踰於山丘庶西方
之至言聊反聞而逆流守一靜而為君亦何往而不休
已矣乎一晝一夜成四時子之歎川逝不流顏光不可
使東之韓終王子喬汗漫難與期俯寸田之荆棘曷不
旦耘而暮耜悲在堂之蟋蟀慙不樂於唐詩悟死生之
如夢亘今古而無疑

坡門酬唱集卷十六